

le siege neuf moys ; toutesfoys, il ne la sceut prendre, et fut le corps dudit seigneur Guichard mis en sepulture audit lieu d'Affricque, prez du rivage de la mer.

Son cœur fut apporté à Belleville ou il fut ensepveli et mis avec les aultres, ses predecesseurs, par un sien escuyer nomme Brusolin et par le residu de ses serviteurs, comme je lay ouy dire a ses serviteurs.

Messire Loys leur frere fut ung tres grand clerc et orateur, et eust pour sa portion la seigneurye d'Alloigne. Il eust a femme et espouse une dame de Beaujeu sur la Saune, nommee Jehanne, de laquelle il engendra une fille nommee Anthoinette qui fut enterree au prieure de Mamercey, pres dudit lieu d'Alloigne, du vivant de sa mere.

Semblablement monseigneur Loys de Beaujeu, seigneur d'Alloigne son pere, mourust entre Turquie et Armenye, ou il était alle avec moult noble compaignye lan mil trois cens, et fut ensepulture en la citez de Raguse, en la seiche Esclavonye, en habit de cordellier, en leur couvent dudit lieu.

Et neantmoyns fut fait son obseque et service général a Belleville en Beaujolloy, lan mil trois cens, le jour du moys de

Et pour retourner a Messine, Eddouard et ses enfans, lequel estoit le premier ne de messire Guichard le Grand et son heritier unyversel et par institution testamentaire dudit Guichard. Il est vray, comme diet est, que ledit messire Eddouard, mareschal de France, mourust a la bataille de Herdres, pres de saint Omer, et delaisa messire Anthoine de Beaujeu, son filz, son heritier unyversel, lequel nasquit au chasteau de Pailly, pres Villefranche en Beaujolloy, lan de notre Seigneur mil trois cens quarante troys, le douziesme jour daoust.

Mondit seigneur Anthoine de Beaujeu, seigneur de Beaujolloy, eust a femme et espouse madame Beatrix de Chaalon.